

ياردىم چىل دوستلار ناغىلى:

بىرى وار ايدى بىرى يوخو ايدى، تانرى دان سونرا هئچ كيم يوخ ايدى...

گۆركملى بىر يئر و ديگر طرفده بىر داغا بنزر اوجاليق وار ايدى.

گونلرين بىر گونونده، گول کوتانين ديبينده بىر گۆزه ل دووشان خانيم بالاسينا سسله ندى:



گل آى جانيم!

اوغول بالام دور گئدک - داغ دؤشونو سئير ائدک

ايلک يازين خوش چاغى دير - اؤنده قافلان داغى دير.



بالا دووشان سئوینجک - آتیلدی دوشدو قوش تک
بالا یئرکوکوسون تئز یئییب، دئدی آی آنا گئدک.

.....

آنا بالا آل آله - اوز قویدولار گؤی چؤله
چیخدیلار داغا داشا - داغی آلدیلار باشا
چاتدیلار ذیروه یه لاپ - دووشان باشلادی تاپ تاپ
آتیلماغا، دوشماغا - اویناماغا، جوشماغا

.....

آنا هایلادی آمان! - آرجا اولسا دینج دایان!

بیخیلارسان آی اوشاق - قوی سلامت یئتیشک

قیچین بورخولار اوغول - اوغول دئمه بیر نوغول!

.....

آمما بالاجا دووشان بو حالدا - آناسی قالیب دی دالدا

قیریلدی بیردن بیره - آسقی سی دوشدو یئره!

دویمه سی قویدو قاچدی - داغی، دره نی آشدی

آغلاماغا باشلادی - دویمه م دئییب توشلادی



آناسی دئدی:

آی بالام! آغلاما دویمه آلام!

آسقى نى باغلارام من - آغلاسان آغلارام من!

.....

آناسى بئىلە ياشىندا - بىلمىردى داغ باشىندا
دويمە ھاردا - ساپ ھاردا؟! - ايىنە ھاردا- ساپ ھاردا!؟!

.....

بالا دووشان آغليردى - يامان آجى باغرىردى
آناسى فيكرە جوموب - نئىلە سىن دىە توموب

.....

او حالدا بىرجە كىرپى - گلىب مئيدانا گىردى
گوردو بىر دووشان آنا - باغرىندا بىر كۆك بالا
ائھمال ائھمال دىندىرير - اونو داغدان اندىرير




دئدى كىرپى :

آ دووشان خانیم! - نه دیر کدر آی جانیم؟
بو بالا نه دن آغلاییر؟ - سنین اوره بین داغللاییر!
آنا دئی :

قالمیشام! - بونون آغرین آلمیشام!
دویمه سی دوشدو گتدی - داغ دره لرده ایتدی
ایندی نه ایینه نه ساپ - داغ باشیندا دویمه تاپ
کیرپی بیر آز دولاندی - دویمه دئییب توولاندی
بیردن باغیردی کیرپی :

آهان! - علاجین تاپدیم اینان!
داررخما دووشان ننه - گل سنه وئریم ایینه
چک تیکانیمدان بیرین - داماغیز اولسون شیرین
قالدی دویمه قالدی ساپ - بیر آز دولان آختار تاپ!
ایینه نی آلدی آنا - ساغ اول دئی تئز اونا
قالدی ایینه ساپ ایشی - دویمه ایشی آی کیشی!
او حالدا بیر سس گلدی - داغدان بیر گئچی اندی
باخدی کی دووشان ننه - الینده بیرجه ایینه
دایانیدیر بیر داشا - فیکره جوموب بیر باشا



گئچی دئدی :

نه دير آ دووشان! - منم سندن سوروشان
بو غم، غوصه نه دن دير؟ - باغرين زدن - زدن دير؟

دووشان دئدی :

بو ايينه! - ساپيم يوخدور سن دئنه !

گئچی دئدی :

اولاندير! منيم توکوم کوتاندير !

ساپ يئرینه اونو قوي - آل تئليمدن بيرين سوي !

آنا دووشان سئوينجک - توکدن بيرين چک ها چک

نهایت دارتيب آلدی - گئچی نی يولا سالدی

الينده بير ايينه ساپ - گل ايندی بير دويمه تاپ !

آنا هله چاره سيز - بالا باغيرير تئز! تئز !

دويمه سيز آسقی اولماز - داغدا دا دويمه اولماز

هله بالا باغیریر - دویمه سینی چاگیریر
بیردن داغلار تیتره دی - آنا دئدی بو نه دیر؟
داغی داشی سس آلدی - هاممی حئیرتده قالدی
نه دیر گۆره سن بو سس؟ - جاناوار دیر یوخسا کس؟
قورخا قورخا دووشانلار - داش دیبینده قالانلار
گۆردولر آنی حالدا - تاپ تاپ گلیری دالدا
بیر آغیر آياق سسی - یامان اودلو نفسی
گۆروندو قافلان گۆزه - هئیکلی چیخدی دوزه
آنا بالا تیتره ییردی - دیشی دیشینه دییردی
آستاجا آنا دئییه ر - بو یقین بیزی یئییه ر!
اوغول بالا تئز گیزلن! - چیخماسین سسین گیزلن!
یوخسا گۆررسه بیزی - آلارسا دووشان ایزی
بودار هم سنی، همده منی - زوردا یوخدور هئچ کمی
گۆرونمه هئچ گۆزونه - باخما اونون اوزونه
ییرتیجی دیشلری وار - دهشتلی ایشلری وار
قافلان ایره لی گلدی - دووشانی بیر اییله دی
توولادی بوی، باشینی - اویناتدی گۆز قاشینی
دئدی قافلان:
چیخین بو داشدان - قورخمایین من یولداشدان
ایندی جه بیر قوچ یئدیم - تانریا شوکور دئدیم

آج اولماسام يئمه رم - بيلين! يالان دئمه رم!
سن ده سؤيله هم الان - نه دن آغلاير بالان؟



آنا دووشان آستاجا - آچدى گؤزدن بير باجا
قورخا قورخا سؤيله دى - قافلان حقا دينله دى
آنا دئدى:
آي قافلان قارداش - دووشانلار ايله يولداش
منيم بو بالا اوغلوم - اوغول دئمه، نوغولوم
دويمه سيني ايتيردى - منى تنگه گتيردى
ايندى بير ايينه م واردير - بير ساپ اونا سواردير
آمما دويمه سى يوخدور - تيكمه يه موشگول چوخدور

قافلان گولدو اوجادان - قوشلار اوچدور باجادان

قافلان دئدى:

دويمه نه بوى دا؟ - بالا، بويوك يول يول دا

اولسا ايه ر ايينه يه - گؤتور خاليم دويمه يه

دووشان بالا سئوينسين - اوره يى شاد دؤيونسون

دووشان باخدى پلنگه - چيخماق اولماز كى جنگه

آنا دئدى:

اولار! وئر قارداش! - دويمه نى وئر تئزجه قاش

بالام قورخور سندن - بئله گوبود بئندندن !

دويمه نى آلدى آنا - ايينه نى تاخدى اونا

قافلانا دئدى آنا :

ساغ اول! - گؤررسم سنى بو يول

يئركوكو وئررم سنه - يارديم ائيله دين منه !

قافلان دئدى :

گؤر ايشين! - اوزاتما بئله ديشين

من يئركوكو يئمه رم - اونا يئمك دئمه رم


من يئيه رم اوو، قوزو - اولسا ياغى يا دوزو

دئييب باش آلدى داغا - باخاركن سولا ساغا

دووشان ننه آيله شدى - تيكمه يه چوخ آللشدى

گئچى وئر ن تئل ساپى - گئچيرتدى قاپى قاپى

پلنگین قارا خالین - تیکدی او قئیم قالین
آسقی یئرینی آلدی - بالانین کئفی سازالدى
یول آلدیلار گلمه یه - داغدان بری انمه یه
هر ایکی سی کئفی چاغ - سؤیله ییرلر ماهنی، لاغ
دانیشیرلار گولورلر - یامان کئفی سورورلر



آنا دووشان آستاجا - ایسته دی بیر سؤز آچا
دئدی اوغلونا سؤزلر - ائشیتمه یینه دیه ر
آی منیم اوغول بالام! - هر گون قادانی آلام

حیات بئله دیر، بئله - چالیش توخونما ائله
توتسان بیرینین الین - توتارلار الین یقین
یاردیم ائتسن بیرینه - اوشاق، جاوان، پیرینه
یاددان چیخماز هئچ زامان - حقیقتدیر بونو آن !
وئرمه سه ائل آل آله - اینانما خوشلوق گله
الیندن گلیر هر نه - عارسیز یئتیر یئرینه
دوستون مین اولسا آز دیر - چوخ اولسا کئفین ساز دیر
ناغیل باشا چاتدی، دووشان بالا مطلبینه چاتدی.

بو ناغیل خانیم زهره وفایی نین یازدیغی ناغیل دیر. یالنیز اوشاقلارین رسیملی
ناغیللاری سئومک سببیه، من بو رسیملری چکیب ناغیلا اکله میشم. اوماریم کی
هئچ کیمسه نین حاققینا ال قویمامیش اولام.

درین حورمتلرله